

Na osnovu člana 11. Zakona o privatizaciji preduzeća ("Službene novine Federacije BiH", broj 27/97, 8/99, 32/00, 45/00, 54/00, 61/01, 27/02, 33/02, 28/04, 44/04 i 42/06), Upravni odbor Agencije za privatizaciju u Federaciji Bosne i Hercegovine, na sjednici održanoj 26. maja 2008. godine, utvrdio je

**PRAVILNIK
O POSTUPKU PRODAJE
DRŽAVNOG KAPITALA NA BERZI
(Prečišćeni tekst)**

I. OPĆE ODREDBE

Član 1.

Ovim Pravilnikom propisuje se postupak, uslovi i način prodaje državnog kapitala u obliku dionica u društvima (u daljnjem tekstu: dionice društva) na berzi.

Član 2.

Prodaja dionica na berzi je metod privatizacije državnog kapitala putem javne aukcije i redovnog trgovanja na berzi, a u skladu sa odredbama Zakona o privatizaciji preduzeća ("Službene novine Federacije BiH", broj 27/97, 8/99, 32/00, 45/00, 54/00, 61/01, 27/02, 33/02, 28/04, 44/04 i 42/06, u daljnjem tekstu: dionice društva) na berzi.

Član 3.

Agencija za privatizaciju u Federaciji Bosne i Hercegovine i kantonalne agencije za privatizaciju (u daljnjem tekstu: nadležna agencija) je prodavac u postupku prodaje dionica društva na berzi.

Nadležna agencija provodi postupak koji podrazumijeva sve potrebne radnje s ciljem izdavanja prodajnog naloga profesionalnom posredniku.

II. PRIPREMNE RADNJE

Član 4.

Odluku o prodaji dionica društva na berzi donosi vlada nadležna za upravljanje državnim kapitalom u društvu (u daljnjem tekstu: nadležna vlada), na prijedlog nadležnog ministarstva, odnosno agencije.

Odlukom se utvrđuje obim prodaje državnog kapitala (procenat državnog kapitala ili broj dionica).

Član 5.

U skladu sa odlukom iz člana 4. ovog Pravilnika, nadležna agencija sačinjava plan prodaje dionica društva na berzi, koji sadrži:

1. podatke o društvu (naziv, sjedište, djelatnost, podatke o poslovanju društva i podatke o dionicama društva),
2. podatke o državnom kapitalu i obim prodaje,
3. podatke o prethodnom trgovanju dionicama društva na berzi i dinamiku prodaje dionica,
4. način utvrđivanja početne prodajne cijene.

Plan iz stava 1. ovog člana odobrava upravni odbor nadležne agencije.

Član 6.

Predmet prodaje je dio ili cijeli paket dionica društva, koje se u skladu sa ovim Pravilnikom, Odlukom nadležne vlade i Planom iz člana 5. ovog Pravilnika prodaju na berzi.

Član 7.

Počet na prodajna cijena jedne dionice društva utvrđuje se kao minimalna cijena koja se mora ponuditi za zaključenje prodaje.

Prilikom izdavanja prodajnog naloga profesionalnom posredniku unosi se počet na prodajna cijena, odnosno korigovana početna cijena.

Član 8.

Početnu prodajnu cijenu jedne dionice za društva sa čijim se dionicama trgovalo na berzi, utvrđuje nadležna agencija na osnovu zvaničnih podataka berze, najmanje u visini ponderisane prosječne cijene dionica za posljednjih 10 dana kada se trgovalo dionicama emitenta čije su dionice predmet prodaje.

Početna prodajna cijena jedne dionice, za društva sa čijim se dionicama nije trgovalo na berzi, utvrđuje se u visini nominalne vrijednosti dionica društva.

U ponovljenoj prodaji, za društva sa čijim se dionicama nije trgovalo na berzi, počet na cijena dionica utvrđuje se u visini najviše cijene za dionice ponuđene na prethodnoj neuspješnoj prodaji.

U ponovljenom postupku prodaje dionica društva na berzi prodavac može utvrditi novu početnu prodajnu cijenu u skladu sa stavom 1. ovog člana.

Član 8a.

Početnu prodajnu cijenu jedne dionice iz člana 8., može jednokratno korigovati direktor nadležne agencije i to do +(plus), - (minus) 10%, a Upravni odbor nadležne agencije preko 10%.

Korekcija početne prodajne cijene može biti izvršena u toku procesa predmetne prodaje do okončanja prodaje.

Korekciju početne prodajne cijene vrši direktor nadležne agencije u skladu sa planom prodaje dionica društva kojeg je odobrio Upravni odbor nadležne agencije.

III. ODABIR PROFESIONALNOG POSREDNIKA I OGLAŠAVANJE PRODAJE

Član 9.

Nadležna agencija za profesionalnog posrednika bira jednog od tri člana berze koji su ostvarili najveći promet u prethodna tri mjeseca, izuzimajući promet dionicama u državnom vlasništvu, a prema zvaničnim podacima Sarajevske berze - burze.

Osnov za odabir profesionalnog posrednika iz stava 1. ovog člana je najniža cijena posredničkih usluga za predmetnu prodaju koju profesionalni posrednici dostavljaju po pozivu nadležne agencije.

Ukoliko ponuđači ponude istu cijenu usluge, bit će odabran onaj ponuđač koji je ostvario veći promet u posljednja tri mjeseca.

Prema opredjeljenju nadležne agencije, drugorangirani i/ili trećerangirani ponuđač mogu biti profesionalni posrednici u predmetnoj prodaji ukoliko prihvate uslove prvorangiranog ponuđača.

U slučaju opredjeljenja nadležne agencije iz stava 4. ovog člana, prvorangiranom ponuđaču će se izdati prodajni nalog za prodaju najmanje 60% dionica predmetne prodaje, drugorangiranom 25% i trećerangiranom 15%, ukoliko prihvataju uslove prvorangiranog ponuđača. Ukoliko drugorangirani i/ili trećerangirani ne prihvataju uslove prodaje prvorangiranog, pripadajući procenti se daju prvorangiranom

ponuđaču.

Nadležna agencija sa odabranim posrednicima zaključuje ugovor o obavljanju brokerskih poslova.

Prigovor na izbor profesionalnih posrednika može se podnijeti Upravnom odboru nadležne agencije.

Član 10.

Obavijest o prodaji dionica društva na berzi i način na koji se mogu dobiti informacije o društvu, nadležna agencija oglašava u jednom od sredstava informisanja dostupnom na teritoriji Federacije Bosne i Hercegovine i na web stranici Agencije za privatizaciju u Federaciji Bosne i Hercegovine, najmanje 7 dana prije termina određenog za prodaju dionica.

Obavijest iz stava 1. ovog člana, nadležna agencija istovremeno dostavlja i berzi.

Nadležna agencija nije obavezna provoditi aktivnosti iz stava

1. ovog člana u slučaju:

1. ponavljanja nakon neuspjele prodaje dionica društva na berzi i

2. ponavljanja prodaje dionica društva na berzi pri kojoj su dozvoljeni kupovni nalozi sa količinama koje su manje od količine u prodajnom nalogu.

IV. PRODAJA

Član 11.

Trgovanje dionicama društva provodi se u skladu sa propisima Sarajevske berze - burze i drugim propisima kojima je regulisano trgovanje vrijednosnim papirima.

Član 12.

U slučaju nastavka ili obnove postupka predmetne prodaje vanrednom aukcijom, postupak može biti pokrenut u roku ne kraćem od 7 dana.

U ponovnom postupku prodaje dionica na berzi, prodavac može sačiniti novi plan iz člana 5. ovog Pravilnika.

Član 13.

Novčana sredstva ostvarena prodajom dionica koje su predmet prodajnog naloga prenose se na račun nadležne agencije, a raspoređuju se u skladu sa Zakonom o privatizaciji preduzeća.

Član 14.

Ovaj Pravilnik stupa na snagu narednog dana od dana objavljivanja u "Službenim novinama Federacije BiH".

Član 15.

Prečišćeni tekst Pravilnika o postupku prodaje državnog kapitala na berzi obuhvata: Pravilnik o postupku prodaje državnog kapitala na berzi ("Službene novine Federacije BiH", broj 58/06), Pravilnik o izmjenama Pravilnika o postupku prodaje državnog kapitala na berzi ("Službene novine Federacije BiH", broj 32/07), Pravilnik o izmjenama i dopunama Pravilnika o postupku prodaje državnog kapitala na berzi ("Službene novine Federacije BiH", broj 6/08) i Pravilnik o izmjenama i dopunama Pravilnika o postupku prodaje državnog kapitala na berzi ("Službene novine Federacije BiH", br. 19/08) u kojima je označen dan njihovog stupanja na snagu.